

التوب الضيق

مطبوعات القجر

32

شعر بالعامية المصرية

وفاء أمين

تقديم الدكتور يسرى العزب

مطبوعات للفجر
تصدر عن جماعة الفجر الأدبية بالقاهرة

المشرف على التحرير

دكتور بسري العزب

المراسلات باسم: المشرف على التحرير
الجنة - أرض اللواء - فيصل
١١ ش محمد منصور
تليفاكس ٥٧٠٢٢٤٢

لوحة الغلاف للفنان

جورج بهجوري

الإهداء

إلى الضحكة البريئة في عالم ضاعت براءته
إلى نور عيوني في ليل طالت ظلمته
إلى الحياة التي أهدتني حياة أجمل ...
إلى ابنتي ...
والله من وهبها لي بفضل الله تعالى
إلى زوجي .. وأبنائي
أهدي قصائدي وامتناني وحبّي

التوب الضيق

قراءة نقدية : د. يسرى العزبج

من الزجل إلى الشعر العامي تتطلق قصائد هذا الديوان الجديد للشاعرة وفاء أمين.. متجاوزة - إلى حد بعيد - ما قدمته قصائد ديوانها الأول (عصفور الحرية) الذي أصدرته في عام ٢٠٠١.

سنوات أربع تفصل بين الإصدارين.. لكن هذه المسافة الزمنية القصيرة دفعت في الشاعرة إمكانات فنية جديدة.. تلو بالبدايات إلى درجة عالية من النضج الفني.. وتتطلق عبر قصائد ديوانها الجديد (الاثنين والثلاثين) مشكلة تجاربها جماليا بإمكانات فنية أقوى.. منها امتلاك للإيقاع التفعيلي استطاعت به أن تعبر بأسلوب أكثر سلاسة ورشاقة دون وعورة تلجئها إليها القافية كما في قصائدها السابقة..

يندفع الشعر تلقائيا كما نرى في قصيدة (أبو الأحقاد) التي تقول فيها :

وعايزني أكون حلوة
يا ابو الأحفاد
واغني كل يوم غنوة
واتزوق مع الأوقات
وبعد العمر دلوقتي
وبعد عذاب قتل وقتي
ما بين آلامي وكفاحي في دوامات
دموع عيني خلاص جفت
وقلبي باش ومتفتت..

في هذا المقطع انسيابية لغوية تحمل معها انسيابية
للفكرة التي تتولد شيئا فشيئا داخل النسيج الجمالي الذي
يتصاعد بقوة حتى نهاية القصيدة وهي ميزة جديدة نجدها
في معظم قصائد هذا الديوان حيث نجحت في التعبير عن
المسكوت عنه من عواطف وانفعالات شديدة الخصوصية ..
لم يقترب منها أحد.

وفي ديوان (التوب الضيق) عبور حميد من
المباشرة والتقريرية (وهما سمتان زجليتان) إلى الرمزية
الشفيفة (وهي سمة شعرية) وهو ما نراه جليا في قصيدة

(شجرة ضل) فبينما ترمز الشجرة دائما للرجل في أدبياتنا
العربية نجد الشاعرة تعكس هذه الدلالة فتجعل المرأة هي
شجرة الضل لمحبيبها الذي تراه عاريا في صحراء ليس
بها نسيم أو ظل..

عايش لكم ..

بتأخذوا عمره ما تسألوش

محتاج لإيه؟

وتتسوا حلمه ما تعرفوش

محتاج لمين

- محتاج (أنا)

أنا شجرة الضل الحنون

يرتاح هنا

لما عليكم يوم يهون

ونجد هذه الرمزية منتشرة في قصائد (عروسة

قماش، حلم العفريت، وردة حمراء، المأظلة حرة، ضمة

جناح) وسنجد أنها تقع في الدرجة الفنية الأعلى.

كما نرى الشاعرة تجيد التنقل في الزمان، فتعود

من الحاضر إلى الماضي الجميل، وفي المكان، فتنتقل بنا

من المدينة إلى القرية، في نقلة اجتماعية ولغوية جيدة. حين تستخدم الواقع الصعيدي بعاداته وتقاليده وسطوة الرجل فيه، وبلغته التي تستطيع - وحدها - حمل كافة التفاصيل في هذا الواقع. وهو ما نجده في ثنائية (ملوم وامراته) وفي (عروسة قماش) و (ماريكا العالمة).

وإذا كان الانتقال في الزمان والمكان قد أعطى نصوص الشاعرة اتساعاً في الرؤية فإن التنقل بين الذات والواقع قد أعطى الديوان راحة في هذه الرؤية.. بحيث نجد تنوعاً في تصوير العلاقات الإنسانية المتعددة بدءاً من العلاقة بين الرجل والمرأة ومروراً بعلاقة الذات بالواقع، وبالقضايا العامة التي تشغل هذا الواقع وتشغل الذات باعتبارها جزءاً من هذا الواقع.

د. يسرى العزب

٢٠٠٥/٨/٣٠

فروق طفولية

لما أتأمل صورة نونو ع الحيطه
لايس برنيطة.. رامي البزازه على صدره الشبعان
في رقبته دلالة ذهب من نهب جدوده الأمريكان..
مسنود بمخدة ريش في سريريه المتزوق بالكرانش..
من دموية عافية ناطقة خدوده بالوردة الطازة
وشفايفه حباية كريز..
وفي عينه فروزة تضحك في الصورة برة الأفريز
النونو ده طالع م الحمام..
جسمه معطر.. بصابون برفان ضحكته سكر..
أجمل صورة تشوفها لنونو.. ويخليك تتمنى تكونه..

فجأة بسرعة تتطفئ عيني صورة نونو
من ليل الظلم اللي ف أفريقيا..
لابس هلاهيل روبايكيا ..
وعضامه بارزة م الجوع والنوم ممنوع
ما يبطل زن
على لقمة عيش .. أو ضرع حليب
الروح بتروح وتغيب ..
على كتف الأم اللي بتتن وتبستر منه هيكلم ممسوخ
قلبها من صرخة موته مشروخ..
عمالة تعافر .. ترميه على حرف مقابر
من كتر ما فيها عضام ..
ما تلاقي مكان .. أطفال وشباب وشيوخ ..
وعفانة الريح تحذف في جماجم بتهاجم في حلاوة الروح
والموت عشوائي ف كل مكان ..
فقت على صريخ .. زلزال بيطلقك عضم الأرض
من غضب الخط ، الطول والعرض..

تهتز الكرة الأرضية
ولا حد ببسأل وده من إيه؟
الظلم دا طايح كده ليه؟
الموت أرقام والجوع إعلام..
إفريقيا مزاد علني لكلا ب..
بتقطع لحم الثروات
وتهو هو في المؤتمرات.

*

التوب الضيق

ضيق توبك مش على قدك ..
وده مكتوبك فعلا قدرك ..
بس لإمتى حيفضل خانقك
واجع قلبك كاتم نفسك
هرب فيك كل عواطفك
تسهرى وحدك تنزفي رفضك
ياه على صبرك عمره بعمرك
ويا الليل أحزانه تهدك
شقي التوب لساہ بيضايقك
واخرجي منه الدنيا عبايتك

دنيا براح اضحكي في مرايتك
ياالله قوام إرمي الكتمة ..
إرمي العتمة من ورا ضهرك
ياالله قوام خطوة لقدام
مستتية الدنيا مشاعرك ..
فاردة إيديها الحلوة حتاخذك
مالك؟

إتسمرت تاني مكانك
مالي الخوف عينك وكيانك
ليه بتضيع منك احلامك ..
ليه ترجعي تاني بزمانك
راضية بظلمك راضية بحزنك
راضية بحلم عنيد ببيضمك
تجري تخشى التوب الضيق
وحنان قلبك ليه منهيأ ..
تاني تخشى التوب الضيق .

*

كفاياك ترحال

حلفتك ..

بسنيين الشمس العرقانة

على جبينك لؤلؤ سيال ..

بأغاني الهمس الولهانة

ما بيني وبينك .. كفاياك ترحال

بعيون سهرانة على حنينك

والشوق موال .. كفاياك ترحال

حلفتك

بالكاف والنون ..

والحب الباقي المكنون

خلليني أكون
دايما جنبك دانا بيبك مجنون
قريبك ده حلال..
كفاياك ترحال.

*

الضحية

أيوه أنا .. والضحية هيّ أنا
بس السبب كان هوّ ..
فعلاً مش أنا ..
دبحته على أورمة هواني
وفصلت ظلمه اللي -كواني
قتلت فيه عذاب سنيني
قطعت ذل كان شاريني
وطعنت قلبه اللي ما حبش

مرة واحدة ..
مرتين ..
وعصرت قسوة دمه
صبتّها في كيسين ..
وشربت لي وشربت له ..
في صحتي وقلبي أنا
لما عاش محروم حزين
وشفيت غليلي بضحكتين
ودموعي طفت الحب القديم
واديته ضهري كرهت
البح بصفته ..
كان فيها واحدة
سارقة طلته
وعشانه بعبه وقرار
أخير أنا ليه بعبه

ما بقنش ليه أبدًا
خلاص علشان
خلعتنه!!

*

عتاب ولوم

من مرآة لملوم

لملوم
جانني اليوم خبرك ويا السنيورة
أمّات شعور طائيرة ومبدورة
اللي بتغوي حكاوي السيما ..
وترجج صوتها وتنده لك .. ليما ..
ما بتشبهنيش وأناي ما اشبههاش
اللي بتاكل لجمتها بلاش ..
آني واجفة زنهاري ليل ويا نهاري

كيف النخلة المسجية عذاب ..
وطين الأرض بياكل رجلي ويبئت في شجوج الاكعاب
وجمر الشمس بيرجد على راسي
وهمة يدي بتزعج على فاسي .. وأنفاسي
بترمي الضل على عيالي
وعمالك م الثانية يا غالي
الثانية نهار وليل تشئمني وتجول لي يا جانية تعالي..؟
كمني فجت وانت سافرت ..
لاجل تسدد دين الأرض وتشتري طين يلم العرض
وجلنت لي راجع بعد اتناشر شهر
ومعاك اللي يعيننا على الدهر
والسنة بتدور وفاتوا اتناشر ووراهم ست شهر
وآني منتظراك
والليل يا جي ويعشش في البيوت
والخلج تمام وتحلم بالجوت بس آني ماعيش حج النوم
وكائة وصابرة باجول مجسوم .. وعيني ع الباب

على خشم الباب وف بالي راجع لملوم..
تملا شتايمه صحن الدار ويجول لي بت اجعدي ريحي
وجولي لي الأخبار وأنى منتظراك..
ويعاود فجر شجاي يطل ف عيني
وعين البندجة تصرخ طاوعيني..
لملوم غير خلجاته وحلج شنباته
والبت بتزرع في بطاطه غيطان الجور
لاجل ما يجور على عياله وامات عياله الاتنين
والتالته حتموت عيلتين
وصرخت مرارة الصبر ف حلجي
حد الله بجى حده
وحدي..
لملوم الغالي العالي أبو عيالي..
بيطاطي للسنيورة او نخ؟
لملوم لما يعاود حتماً لازماً
ينطخ .

رد عتاب لملوم

أم عيالي
مرسالك جالي ..
وكلامك على سبعك جاني
سنيورة مين اللي تلف على لملوم؟
لملوم؟ السارح بعربية توم؟
لملوم البطلان

اللى بيسأل ربنا حج اليوم؟
وكمان ع تجول لي يا (ليما)؟
زي بتوع السيما؟
اتخلبط عجلك خليبط ..
وكلامك ماسخ وعيبط
إني أول ما ادليت
شمرت دراعي مع البنا .. وبنيت
وبدمعة جلي غنيت
يا وابور الساعة اتناشر
يا مجبل ع الصعيد
لملوم متشوج ياما
يتشعبط في الحديد
أو نفسه يشوف عياله
وف جليه نار بتجيد
همل أمه ونسوانه بيعددوا .. تعديد

واني عايش يا ام عيالي ميت حي
باشرب عرجي لو مالجنش حج المي
فضوا المعمار..
أجرّت حمار وعربية..
وحمّلت التوم
سهران طول ليلي
وعيونني ما شايفاش النوم
معجون في مرار
مش لاجي فرار
باهرب فيّ..
جواي الشاي المغلي
المجطورع الجلب
وفي يدي كبابي النار
اللي تعلم على جلدي الحرج..
بس اني عرفته المنام

ابن النمامة اللي كلامه كلاته كذب ف كذب
كان جاعد وياي اهنه وشافني
واني بامضغ عيش الغلب
صدجتيه
صدجت وكذبت لملوم
وكيف يا هبله اغير خلجاتي
شرفي أو سلو بلادي ..
واجداي ومن بعدي أحفادي
سنيورة مين عتخليني
على عيالي أجور؟
جومي فزي يا بت
ولمي عيالي ومرتي الثانية وامي
ويمين بالله من دلوج
راح الملم همي ..
واول ما اتدلي ان شفت الشر...

ف عينك يمي ..
حتكون ف باطي الثالثة ..
اللى حتحمل همي ..

*

ماريكا العالمة

جالوها زمان ولسه عليها ابنمشي
ان خفت ما تجولشي وإن جلت ماتخافشي
ما بنخافش وعنجلها لكل الناس
وحسنا عايدوي أشد وأعلي م الأجراس
ما عايزينهاش اللي اسمها ماريكا دي
مره جادرة بتتلوي وتتلوي
كما الحية على المزمار..
وتترجص وتتمغص تخلي الجثة جمرة نار

منين جابوا لنا دي العالمة..؟
وليه دسوها وسطينا؟ .. ومين رخص لها تجينا؟
على الشاشة نهار وليل تبرش بششمها لينا
تسبّل لما تعمينا ولانشوفش نساويننا
ونحلف يحرّموا علينا.. وننعس تيجي على بالنا
تخلّي حلمنا جنة .. نجوم من نومنا نلجهاشي جنبينا
مرة جادرة وبدها ألف رصاصة تدب في عنينا ..
ندور ضهرنا ليها نلاجيها على برنا الثاني
تطخ شبابنا واماتنا نجتل حتى في عيالنا وبعدها تشتمنا
وتفجع صوتها حياني وتجري بيه على الأبواب
تجول غيتوني يا عالم من الإرهاب غيتوني يا أحباب
ولسه دمنا في يدها الفاجرة.. ولسه دمعة عيالنا على
ضحكها الغادرة
دي شجابت حالنا وأحوالنا .. وكذابة ومين عيصدج الكداب
وكل احبابها كدابين وغشاشين ..
تدس بيناتنا منخارها

تخلي شبابنا اللي زي الورد..
دولم بطلانين وعطلانين عن الواجب
وسلو بلدنا في عينهم ماهوش عاجب
وجادر ربنا يجيب عاليها واطيها..
ما يبان لها عمار ولا بنايين
وجولوا وراي آمين.

*

عروسة قماش

ما لناش في الاختيار
ما فيش بت في نجعنا تختار
العقل فينا مكتفينه
ولسانا عاد مسكتينه
برعب وبذل المرار
وكنا صغار بنانيت نلعب قدام الدار
وننده بعض ونتلاقى
ونعبي الضحك ونتشاقى

ومعانا عرايسنا قماش
وعروستي تمللي ف حضني ما افارجهاش
ويوم كان حرّه خانقني
وهم غتيت مصاحبني
سمعت حديث ما بين الداية سعدية
ويين أمي..
يقولوا يا دوب نختها
وردت أمي قالت صح
تعالى معاي نفطمها
قالت لها لا نجول لها كيف
واخدينها كه على قضاها
ناخذها احسن على غماها
لجيت الداية سعدية جصاد مني
وبصت لي
وعمري لحد دلوج
باشوف الغول ف بصتها

لجيت قلبي وجع مني
بدجاته اللي كرهتها
جريت منهم وجابوني
بسرعة كنفوا ايدي
وغموني وانا باعافر برجلي
صرخت بأعلى ما في
سيبوني حرام حتعملوا ايه؟
دموعي اتوسلت لأمي
ورحمة ابوكي والنبي يا أمي
سرجت حفان من السكر
خلاص ما عادتش تتكرر
وأمي بعيد ولا اسمعهاش
وعمري إترعش كله
ودمعي نام على ذله
ودلوج ماباجاسي من جوزي..
وعذاب ذله

يشتَمني ويتَأوّر
عاجيب لك ضرة واتجوز
أقول له أباي داني عروسة
وحنّتي ف يدي ماناشفاش
يجول لي عروسة عروسة صح
في عين الناس
لكن عيني اللي شايفاك
دي شايفاك .. عروسة جماش.

✱

ضمة جنام

وتقفي يطل شباكك
على وجوده على عوده
وشايفة ملامحه في عيونك
بيصرخ صوته في جنونك
تقيد منك حروف نوره
تعدى لهفتك سوره
يطير قلبك معاه روحك
وهو المرمي والرامي

وهو جرحك الدامي
طبيب قلبك وإلهامك
وشوقه يسرى في عضامك
مشاعرك جوه أحضانه
يفجر فيك بركانه
وفيك سره وملامحه
شفايفك ضحكة بتسامحه

.....

أيديه مفرودة تنده لك
عيون حبه بتهتف لك ويختارك..
تلين على أيده قضبانك
يحرر كل أوطانك
يضمك ضمة ويشيلك
يحطك فوق على حصانه
ويجري وراك يمشي لك
وبيك يشق ويعدي

حواجز شوق ما بتهدي
ينام حلمك على جناحه
ويرجع بيبك لصباحه
ومين دا الفارس الآتي
ملاحه عليك بتهاتي
هيفضل سر جواك .

*

حلم العفريت

وفي القمقم هنا عفريت
بتبكي حروفه في الحواديت
صفار يغلي في كف يديه
تدور روحه في نني العين
ومتكتف ضلام حواليه
ويزعق زعقة المكتوم
وأه تايهة في ضلمة كون
يصبر نفسه ويسلم

ويرجع ثاني يتألم
ويصرخ يا علاء الدين
أنا المحروم.. أنا المسجون
ومستتي إيديك واحلم
بيوم تمسح على القمقم
وكلمة سرحنقولها
تبسمل يجري مفعولها
تقيم ضهري وأتحرر
أحس بروحي تتغير
ونبرة صوتي بتزلزل
تهز الدنيا وتجلجل
وتصحي عروقي من موتها
واحس ف روعي جبروتها
تفور براكين ونار خمدت
كفاية سنين كثير عدت
كفاية ويل وريق ناشف بدمع النيل

وتأمرني وراك أجري
أنا العفريت نسييت عهدي؟؟
أنا اللي بنيت شموخ مجدي
وأعدائي هنا اتعصروا
سقيتهم مر واتحسروا
فحسبوني هنا ف قمقم..
فمد إيديك واتكلم
أنا باناديك أنا باصرخ
فإسمعني وإنقذني
تلاقيني بقيت حلمك
واحقق لك جميع حلمك

*

صورة زفاف

صورة زفافك بصي فيها

اتأملها

اتملي فيها

ياه!! بقيتي حاجة ثانية

واحدة ثانية

ليل نهارك تصرخي زي العيال

كل همك تمسحي وتطبخي

وان ولادك

جم قالوا لك :

بابا وصل

تطلعي له بالبصل
ريحته طالعة من هدومك
جوه إيدك فص تومك
تمسحي دموعك في كمك
تشتكي له نقل همك
والمصايب كلها سببها أمك
كات حتبقي العيشة حلوة لولا أهلك
إيه مصبرني أنا علي ظلم عيشتك
سايبها لك

حاخلعك

والعيال ذنبهم برضه ف رقبك
يبقي جاي تعبان ونفسه
ينسى إسمه جوه حضنك
يشرب سيجارة
من سيجارة

يجري يطفش م اللي عمالة بتتكش
واما ينزل م العمارة
يلقي جارة ف وشه حلوة
حاطة أحمر واشي أخضر
متغندرة بفستان مشجر
تسريحتها حاجة تسحر
صوتها هادي جميل بيسكر
ينعي حظه
ويومه الاسود
يبكي قلبه
وعقله يعند
إيه جرى لك؟
مش ده اللي ياما حلمت بيه؟
مش ده اللي كنت بترسمي وتخططي
علشان يقع لك وتتولييه؟
واما جالك

واصطفاكِ
وبحياته
إشتراكِ
ضلل عليكِ
واحتواكِ
باس إيديكِ ولم فيهم شبكته
وهبك كمان حريره
ولولاه ما شفت زهور حياتكِ
اللي بتتور حياتكِ..
بصي على صورة زفافكِ
وارجعي ليلة بزمانكِ
احكي أجمل ذكرياته وذكرياتكِ
حتلاقيكي أحلي من صورة
.. زفافكِ ..

*

أبو الأحفاد

وعايزني أكون حلوة يا ابو الأحفاد
اغني كل يوم غنوة
وأتروق مع الأوقات
وبعد العمر دلوقتي
وبعد عذاب قتل وقتي
ما بين آلامي وكفاحي في دوامات
دموع عيني
خلاص جفت

وقلبي باش ومتفتت
تجاعيدى حفرها هم
عروق ايدي بتبكي دم
نسيت خلاص ياابو الأحفاد وبتجافي
جبال تربية الأولاد على كتافي..
أحاييل دي
واخاصم ده
واذاكر تاني ويا دي
ده غير واجبك
ياابو الأحفاد
ما تقدرشي عيوني تبات
برغم النوم بيغلبنى
في عز البرد أتكوم على الكرسي
وشوقي ليك يغالبنى
وهدة حيلي بتعافر
ولما عينيك بتضحك لي

أحسّ الآمي بتسافر
أذان الفجر يهديني
عشان عارف
يا دوب ساعتين
واقوم أبدأ من الأول
وبعد دا كله عايزني
أكون أجمل
من الأول؟
واكون أجمل
وأتحول؟
يا إما عينيك تشوف غيري
صبية ترجعك لزمان
ما غرقشني في دمع هوان
وطول الوقت تضحك لك
وتتلوي
بيان ضعفك

تشدد عليك وتتقوي
وقلبك ليها بيسلم
فا... تتحكم
وهيبتك
لعبة في ايديها
وشيبتك
تحت رجليها
تدوس فيها
صحيح إنك سبب ناري
لكن حاساك بتتالم وبتداري
بتسرق فيك ضمير عمرك
ولا داري..
يا عشرة عمر بتعلم على جروحي
حنانك فين؟
ومن غيرك يكافنتني على عمري؟
ومين وياي حيكمل بقية عمري

ولادك دول خلاص كبرم بقم جاهك
وبنتك باكية في غيابك
وأحفادك بتسالني :
يا تيتة هو فين جدو؟
يا تيتة هو فين جدو؟

*

عشان شاعر

وسبحانك أمرت الشعر يسكنني
ولكني ما بالقاش معاه سكني
بيسحرني ويغلبنني
في عالم تاني يحدفني
يعييني أنا وقلمي
ويسحبني لكلام الميل
يعربدني ويشربني
أهيم وياه في قمر الليل
يطلعني السما بالروح
تنادينني دموع البوح أنا المجروح

ألاقيني الدوا تريق
لكل حزين
يكون مشتاق
ويفتح لي
بببانه الحلوة ع الآخر
ويتاخر
يقعدني
يعلمني
وصوته الهادي
يحضنني
تفرقني شطوط الحيرة في بحوره
توشوش لي نسايم
طالة من نوره
وفجأة بدون ما يندمني
ولا صوته يودعني
ألاقيني

نزلت نزلت أتدحرج
على صخر الحروف أشهق
وتاني أنقسيم وأنشوق
وروحي تنبدر وتنشت
وأرجع تاني لجروحي
يزيد نوحى
تلم الحرف جنب الحرف
رعدة يد
وانا باصرخ : وما لي يد ..
فيرحل تاني من تاني سكن عني
عشان شاعر
وسبحانك
أمرت الشعر يسكنني
ولكني
ما بالقاشي
معاه سكني .

كانوا زمان

كانوا زمان بيقولوا الأرض
هي العزوة وهي العرض
كان الورد البلدي جنان
لما تشمه الروح تترد
كانت لما.. تبقى اللمة
خاله وعمه .. وجدة وجد
شوفوا دلوقت .. باعوا الأرض
وبقسوتهم داسوا الورد

واتفرّقنا لا خال ولا جد
حتى الأب آهو فانتنا بنبكي
هُنّنا عليه .. مابقاش بيرد
كانوا جيراننا يحسوا بحالنا
ياخدوا معانا عزانا بود
شوف دلوقت بابنا في بابهم
واما نحییّ ما نسمع رد..
كانت رحمة مالیه قلوبنا
ندعي نقول: الصبر يا رب
كان الحب جميل وخجول
لو سألونا سكوته يرد
كانت الدنيا حلوة بجد
وفا وسلام والأحلام
حبة بحبة توفي الوعد
شوفوا دلوقت
كل الحب اتحول حقد

ألف جريمة بإسم الحب
دنيا حيطانها بتعلّى تصد
نسمع بس كلام في كلام
لاجل ننام في عسل أو هام
ونلم لسّاننا أو نثسّد ..

*

ضمير سهران

كفاية ونام
بلاش تسرح مع الأوهام
تعب قلبي من الأحلام..
يا نقطة مية قال تنزل
علي الصخرة تفتتها
بصبرك تعدل المائلة
وتسندها مع الشجعان
تولع شمعة قوتها
تنور ضلمة الأكوان..
وبذرة حب نبتتها
بتطرح فوق ميتين فدان
حبايب يحضنوا خلان

يا إيد واحدة.. وبتشابي
ع الإيدين في سلام
وتترجى زمن وحدة
تعود وتجمع الأوطان..
تطير بجناحك الابيض
يهفهف في السما فرحان
وتجري مركبك في أمان
يا ضحكة كبيرة لو تضحك
تفجر م الحنان بركان
تعم الراحة من واحة
نغم رنان ..
وتلبس أمتك توبها ..
ضمير قلبي يا محبوبها ..
لإمتى الشوق لها عطشان؟
أقول لكش؟
كفاية نام ..

*

عيدنا وعيدهم

كل عام واحنا بخير
فرحانين ومعانا خير
والأمان حضن السلام
على كل مائدة وكل دير
والمصلين في المساجد
في الشوارع ع الحصار
والتهاني والأغاني
واللحوم أصناف كتير
والفسح والبالونات

والسهر ويا الشاشات
والملابس الجديدة
الاسترتشات الشديدة
وضحكة في خدود البنات
كل عام إحنا وهم
حزنهم غير أي أمة
كل يوم عايشين في غمة
كل يوم يسقط شهيد
وإزاي يحسوا بإنه عيد
الأمهات ويا البنات
مخنوقين بأيدين حديد
والخوف معشش في الفتات
ممنوعين من الصلاة
ممنوعين من حلم واحد
يضمهم في منتهاه
والسلام خمسين سنة

دايب كلام
وآدي الختام
أعياد تمر بحزنها
والأم بطولها وعرضها
حيسوا إمتي زينا
بالفرحة في عيون الولاد؟

*

بنات بلدي

أنا شاب حزين وهاموت م الغم
على نفسي مش قادر اتلم ..
على عرض بنات بلدي باغار..
في الميادين كده ليل نهار
عرض وديفيليه باستمرار
نازلة شعورهم باستحسان
مصنوعة بكل الألوان ..
والمكياج ع الوش كمان
أما الروح ناري وفتان ..
والدراعات من غير أكمام..
وصدورهم بتطل حنان..

والوسط اللي يميل ويبان
والنص التحتاني يادوب
متفصل خلاني أدوب
تشريح للأعضاء محسوب
مش محتاج للميكرو سكوب
ليه أنا أحمل هم جهاز؟
ليه أنا افكر بقي في جواز؟
ما انتو البركة وكله مجاز!!
الله يرحم أهل زمان..
لما أبويا يبات فرحان
لو صادف بنت الجيران
وان عينه اتقابلت في عيونها
يسهر طول الليل سرحان
وان حياها بطرف عنه..
تتلخبط وكسوفها يبان..
محتشمة وفتانها دليل
طبيعية من غير ألوان

وشها يشبه قمر الليل
والعفة على جبينها نشان
تفاحتين نايمين في خدودها
والرمش مسبل نعسان
يا بنات بلدي ارجعوا لزمان
خطاويكم تثبت قدام
مرايتكم ربوها كمان
ع الحشمة تقول لكو يا سلام..
دا جمالكم مش أي كلام..
سيبكم بقى م الفضائيات
رقص ونقص وعري بنات
وفضايح خارجة ونظرات
تيار ويبسحبنا هوا
ومخطط صهيوني نوى
مع أمريكا على ذلنا..
ولا بد نقول له هيهات.
*

شجرة ضل

من فضلكم اسمعوني كلكم
أنا حبيبتة ..
ورغم ده سايباه لكم
أحلامه كلها ملككم
والفجر في عينيه يضمكم
عائش لكم ..
بتأخدوا عمره ما تسألوش
محتاج لأيه؟

وتتسوا حلمه ما تعرفوش ..

محتاج لمين؟

محتاج .. (أنا)

أنا شجرة الضل الحنون

يرتاح هنا

لما عليكو ف يوم يهون

يحكي لي ع اللي مكره

وحدي أنا اللي باقدره

وحناني آه

بيهدي قلبه يصبره

وحدي أنا اللي أفكره

بأنه يتحب وحبيب

باشتاق له لو عني يغيب

وحنانه لجراحي طيب

ما هو فارس الحلم البعيد

في زمن عنيد

فبلاش بقى ..

تستكثروه

عليّ أنا

وبلاش بقى

تستخسروا فيه الهنا

وأنا راضية بفضل جنبكم

ويجيني مرة في السنة

*

إرهابي

الاسم عربي لكن النقب إرهابي
قالوها بأعلى صوت رنان
وكل الدنيا سمعتها .. بكل لسان
وظلعت ع الشاشات ألوان
بأخطر لون عليه الدم بيشابي
ولزقوا الياقطة على بابي .. دا .. (إرهابي)
تخط البلوى على راسهم ..

سحابة كاتمة أنفاسهم..
ويجتمعوا ويتفقوا .. يقولوا
دا فعل (إرهابي)
ورب الكون بيأمر كون
وکارثة تكون يقولوا
دا فعل (إرهابي)
رياح براكين تزلزلهم..
وميكروبات تموتهم
يحطوا الطين على جنابي
ويتشالوا ويتحطوا يقولوا
دا فعل (إرهابي).

*

محتاجة لك

محتاجة إليك
علشان أديك
وأوهب لك
نفسي المشتاقة
وعمري اللي وقفته يا روجي عليك
محتاجة إليك
علشان أهديك
روحي الهيمانة اللي تملي
بتتادي عليك

واستتي الضحكة اللي تتور

من ضيّ عنيك

محتاجة أديك

كل مشاعري

وحنان قلبي

واحايك

لو تزعل مني

وأصالحك

وكمان أداديك

وأطيب جرحك

وأشيلك

في عيوني

وبرمشي إداريك ..

وأفضل دايما دايما دايما ..

محتاجة إليك

*

ألماظة حرة

لو مال الدنيا ملكك
وعندك الكياسة
أنا ألماظة حرة
برلنت أصلي وماسة
من جوه والا بره
لا زيف ولا خسارة
إزاي تبقي صديقي؟
منين تعرف طريقي؟

وحتى لو جابنتي
أيديك وقلبتني
ما تملكش الفراسة
كل العظماء يجوني
علشان يقدروني
بعينهم يشتهوني
وانا ف أيدي السياسة.

*

مندوق بوية

ع التلتوار
في الحر النار
بيعيط على صاحبه الغايب
على كتفه الشقيان الدايب
وصرخ في الناس..
كان راضي يا ناس..
عدي الشارع مهموم سرحان
والشاب المتهور دهسه..

وكأنه من غير أحلام ..
طب أعمل إيه من بعد اليوم
في عياله النائمة في البدر
لو جريوا عليّ وشالوني
وبدمع عينيهم سألوني ..
والنونو اللي امه زرعت له
بزازة صدره في البلعوم
في حليب الوهم يعوم
طب أعمل إيه
من بعد اليوم ..
كان أكبر عيل في عياله
كان حزنه بريء ..
ورقيق حاله ..
قرب لي وشالني
على كتفه عدلني
وهمس لي ..

انا حاسر ح بيك
أبو ست سنين حسيته
عزمه وإصراره بيكيك
نزلت دمة على خد الأم
مسحتها ف منديلها
- أبو أوية -
كان بدري عليك
يا حبيبي الهم ..
تسرح وتشيل ..
صندوق بوية!!

*

ليلى محمد علي

(إلى روح شاعرة جادة رحمها الله)

يا نور الصبح يا معدي..
وفايت من وراك ليلة
عيونك فيها نور ليلي
وفجر الضحكة من ليلي..
خضار الأرض متخضر
ويروي بقلبها الأخضر
طرح بالحب ميت فدان
ببرمح ضلها الخجلان ويتحول

(فرس جامح)

جناين ورد بتسامح
صفار أوراق من الذكرى
وتبكي ف بحر م الأشواق
ويطويها (طريق بكرة)

(ساعات تفرح)

تطير على فوق وتتمرجح
ما بين بسملة وبين أوهام
وترجع ثاني شائلة آلام
وتقفل آخر (الشبايبك)
تغيب وتنام
وتبعد ..
بعدها يدبح
وتبعد بعدها يدبح.

*

ساعات الليل

ساعات الليل بتتده لك
ساعات الليل بتتبع لك..
عليك بتميل وتشتاق لك..
شموع سهرانة على بُعدك..
وانا وحدي ومش جنبك
ساعات الليل
وقلبي معاك هناك حواليك
هجرني وراح سكن قلبك..

وأملى بحور يعدي سور ويوصل لك..
وخوفي بلاد أتوه فيها..
ورغم ضلامها يهديني شعاع حبك..
ساعات الليل
عذاب في الويل بيتقلب
دموع عيني عليك تهرب
وتشكي البعد وتقول لك
انا وحدي كثير باتعب
وامتى يا رحي حنقرب؟
ساعات الليل..

*

فين ألقىك

ومن غيرك..
حبيبي حياتي من غيرك
قمر غرقان
في بحر ضباب
وصوت حائر ورا الأبواب
ويسأل دمه فين ألقىك؟
وفين ألقىك؟
ومن غيرك..
زهور القلب بردانة وعطشانة
وميتها ودفاها عنك

يتيمة عيوني قلقة وعشمانة
تعيش جنبك

هنا

حوالك

وفين الاقايك؟

ومن غيرك

مراكب ريح

بأحلامي تميل وتطيح

وأيامي وحناني جريح

وأنا باناديك

وفين الاقايك؟

ومن غيرك أنا إيه أكون؟

وإيه يا حبيبي معني الكون؟

سحاب وغيوم وناس بتلوم

وشوق عمره ما كان بيهون..

ولا بالاقايك..

وفين الاقايك؟

جواز عرفي

قلبيها لسه رقيق
والنبض عصفيري بريء
هواها حن .. ما تفهمش
يقرب منها ما تعرفش
تتاجي قلبها تقول له
باحبه
عيونه لما بتقرب
تاكلني اكل

غواها الميل
ورق القلب
زي السيل
وغرقها ولد سهتان
يسبل يهمس الولهان
ويوعدها
بجنة حب في الأيام
وتضحك ضحكة
قد القد ..
وجتها لوحدها الفكرة
لا شاريت حد
ولاباحت بأوهامها ..
لأيها حد
يوشوش ليها في ودانها
ويرمي السهم
ويجبرها على العصيان

فنتسى الأهل
وتلغي العقل
في احضان الهنا بتنام
يا دوب شهرين
تفوتها الضحكة تبكي العين
وتصحى تفوق
في أحشائها جنين غلبان
وتستعطف حبيب القلب
نقول: اعطف وقوم اعلن
جوازنا حلال
وانقذني قوام في الحال
فيتنكر لكل حنان
يقوم غضبان
ويرمي يمين
ويقطع وصلها بورقة
بكل وقاحة مش فارقة

كانه ما كان
أناني جبان يفوتها
في نار أحزان
وإيه غير الندم والويل
بتترجي ودموعها سيل
ولاجل ما يستر المولى
عليها لآخر الجولة
بتخلص من الغلبان
ويبكوا الأهل والخلان
جوازة عليها واتحسبت
وليلة عمرها اتحسمت
جواز عرفي..

*

وردة حمرا

يا اللي زرعت الوردة الحمرا
جوه صحاري القلب باحبك
خدتني مني بقوة حبك
قول للعالم اني باحبك
شلت الخوف مني ف طرقاتي
دُبت ف روعي ملكت حياتي
صحيت كل مشاعري الحلوة
وباغنيك يا مناي في غنوة

يا لحن الشوق والبكا في ناياتي
يا نجم بعيد كل ما ايدي
تقرب منك أرجع ثاني
والم الإيد
واما أقابلك تفرح عيني
أصلى باشوف في عنيك العيد
يطرح أملي
ويطمني
بلقيا جديد
واصبر ثاني على المواعيد.

*

أيا مَك فين؟!

من فوق سموات الروح..
من أعلى سحابة ف إحساسي
جاني وضمني ..
خباني
ف جلايته البيضاء..
خدني .. لفني ..
طبّط على كتفي ورضائي
قال لي يا بنتي اطمني..
صلي وراي

وكبري وبسملي
وكتاب الله
أخذه ف يمناه..
والورد قراه
وانا بادعي وراه
حسيت بالنور
داير ما يدور..
من أعلى السور
حوالينا زهور..
ودموعي بحور
فرحة تهزني..
والمسك عبيره
لإيديه ردني..
يا حبيبي يا ابوي..
نظرة ومدد..
أيامك فين؟

*

بنتقابل

بنتقابل برغم فراقنا .. أنا وانت .. بنتقابل
بنتقابل في قولة آه ..
في كلمة جميلة نسمعها نقول الله ..
بنتبادل .. حنين بحنين
نحن لبعض نتقابل روحين هايمين
بنتبادل سؤال بسؤال ..
حاشوك فين ؟
وتسأل إمتي يا حبيتي

حنتقابل في نظرة عين؟
ونحلم حلمنا الواحد..
ويبعدنا زمن جاحد..
ونتفرق على طريقين..
تدور بينا الليالي سنين..
ونتحدى فراق وأنين
ونكسر شوكة الاليمين
وتجري لبعض أشواقنا
نقرب بُعد مسافاتنا
ونحلم طول ميسا .. فاتنا
ونتلاقى على لهفة
وفرحة عين..
أنا وانت ..

*

من أول نظرة

من أول نظرة القلب يحب
أسرع م الضوء
وسفينة حب رست بينا
على مدد الشوق
وشعاعه ينور ليالينا
طار بينا لفوق
وصبحنا لقينا نفسينا
على كوكب حب

وف لحظة الروح حنت للورد
وغنا العصافير
بصينا على العشاق في الأرض
دول ياما كثير
في دموعهم غرقت نص الأرض
والجو خطير
وما فيش أفراح وجراح بتهد
والحب ضرير
وماخلصناش نسكت ع الظلم
طب نسكت ليه؟
والحب يا ناس إحساس بيضم
يتفرقوا ليه؟
ونزلت ف يم وحببي ف يم
عشاق الأرض لازم تتلم
أيام وسنين ولا بينا حاسين
وياريت سامعين

مش شايفاك فين؟
حتجي لي منين؟
انا تهت خلاص.. أنا قلبي حزين
وبتلكي العين
تاه الإحساس .. مش لاقى خلاص
ادينا الحب واهدينا يا رب
احنا يا عشاق أحباب الأرض..

*

اسمه المر

خليك كده واقف
طول عمرك ..
على أي رصيف
بتزاحم ويا اللي بيجروا
مهزوم وضعيف
ويفوتك لو جيت متأخر
والأمل الحلو بيتبخر
وتفوق على واقع

اسمه المر
مش وحدك مع ناس
تشبه لك .. بتمر
تجري وتصر الحلم
ف منديل
يشلب ويشر ..
عرق ودموع ..
مش لاقى بديل
وبيكبر حجم الممنوع
وبيعلا قدام الجوع
والبنت الحلوة
عليك بتفوت
وعليها عنيك بتشابي
تموت
راضى بحرمانك ..
ثابت في مكانك ..

وجميع ألوانك بهتت
بدموع الهم..
نشفت أيامك على حبل الغم
علشان مشبوكة
بشمس الصيف وخريف
خليك كده واقف طول عمرك
على أي رصيف.

*

فياجرا

ياسنين زمانى اللى بتجري ..
ما تقربيش م الشيخوخة ..
تمانين سنة يا دوبك عمرى
وانا لسه باقظم فى الخوخة
والسنتين اللى ف بقى
متلخلخين وياسنة سوخة
وانا ماشى مرة على مهلى
سمعت بنت بتتده لى
بصيت عليها نسييت أهلى
وعيونى زاغوا م الدوخة
قالت لى إلحقنى يا عمو
شباب كثير بيعاكسونى

تمسكني كحة اما از عق
واسب فيهم يغيظوني
الخلوة جريت على حضني
قلت لها هاتي
ياروحي بوسة
قالت لي عيب
ابعد عني
فرحت قوي مكسوفة مني
جريت وراها عشان اطولها
عكازي خانني ولا طالها
وقعت ركبي ما باقدر شي
طلعت حباية من جيب
زرقا وقلت أقرقشها
ارجع صبي وتشوف عيني
كل الحنان وأفرقشها.
*

999

١٤	كاتوا زمان	٥٢
١٥	ضمير سهران	٥٥
١٦	عيدنا وعيدهم	٥٧
١٧	بنات بلادي	٦٠
١٨	شجرة ضل	٦٣
١٩	ارهابي	٦٦
٢٠	محتاجة لك	٦٨
٢١	الماظة حرة	٧٠
٢٢	صندوق بوية	٧٢
٢٣	ليلي محمد علي	٧٥
٢٤	ساعات الليل	٧٧
٢٥	فين الاقيك	٧٩
٢٦	جواز عرفي	٨١
٢٧	وردة حمراء	٨٥
٢٨	أيامك فين	٨٧
٢٩	بنتقابل	٨٩
٣٠	من أول نظرة	٩١
٣١	اسمه المر	٩٤
٣٢	فياجرا	٩٧
	المحتوى	٩٩

صدر من مطبوعات الفجر

١	تغريبة عزيزاق الهلالي	دراما شعرية	د. يسري العزب
٢	الهاموش	قصص	حسن نور
٣	المبعدون	قصص	إدريس علي
٤	حكايات مصرية	قصص	د. نجدي إبراهيم
٥	الدائرة	رواية	د. نجدي إبراهيم
٦	شجرة مريم	شعر	د. يسري العزب
٧	تأملات في الفن والثقافة	نقد	د. محمد حسن عبدالله
٨	أمسيات عائلية هادئة	قصص	منتصر ثابت
٩	شجر الليمون	شعر	خالد الشوقاتي
١٠	عصفور الحب	شعر	نجاه خليل
١١	حتى لا يطول الانتظار	قصص	محمد نور الدين
١٢	اكتب عمري	شعر	ليلى محمد علي
١٣	زائر بعد منتصف الليل	رواية	مديحة أبو زيد
١٤	خاطنة في الجنة	رواية	يحيى سليمان
١٥	النملة والحداية	شعر للأطفال	عزت زايد
١٦	واحد اثنين	شعر للأطفال	عزت زايد
١٧	المراهن	رواية	سيد أمين
١٨	فيكي إيه يتحب؟!	شعر	جلال الصياد
١٩	فرس جامح	شعر	ليلى محمد علي
٢٠	حريم الملح والسكر	مسرحية	محمد الغيطي

د. يسرى العزب	شعر	قمر المغارب	٢١
د. فاطمة الحفني	شعر	الدنيا جاية	٢٢
منى عوض	شعر	آه يا وطن	٢٣
نبيل أبو السعود	شعر	تخاريف	٢٤
فرج محمود	قصص	ليلة دافنة	٢٥
عبد الحميد فرج	شعر	ضاع الطريق مننا	٢٦
مجدي حمودة	شعر	بشرة خير	٢٧
فرج محمود	رواية	بين الضفتين	٢٨
منى عوض	شعر	انت عنواني	٢٩
عبد الباسط أحمد	رواية	الشاطيء البعيد	٣٠
سيد علي عبدالله	شعر	في العارضة	٣١
وفاء أمين	شعر	التوب الضيق	٣٢

الشاعرة في سطور

- مواليد محافظة الشرقية.
- ليسانس آداب قسم فلسفة واجتماع.
- عضو مؤسس بنادي الأدب، بقصر ثقافة روض الفرج.
- عضو بجمعية الأدباء.
- عضو جماعة أصدقاء سيد درويش.
- صدر لها ديوان بالعامية بعنوان "عصفور الحرية" - عام ٢٠٠١م.

رقم الإيداع : ٢٠٠٥/١٧١٩٨

الترقيم الدولي : I.S.B.N. : 977-17-2613-7

زود للطباعة والكمبيوتر

حقوق الملكية الفكرية والطباعة والنشر
محفوظة للمؤلفة